

AKASHVANI AIZAWL  
REGIONAL NEWS BULLETIN  
HEADLINES (EVENING)

Date – 14/04/2026

Time - 18:30 -18:40Hrs

- Mizoram sorkar leh Hmar People’s Convention - Democratic (Lalhmingthanga Sanate’s Faction) te chuan vawiin khan Sakawrdai-ah inremna thuthlung, Memorandum of Settlement an ziak.
- MNF President leh Chief Minister hlui Pu Zoramthanga’n a chanchin a ziahna ‘From Guerrilla Fighter to Chief Minister’ chu vawiin khan Larsap General (Rtd) Vijay Kumar Singh a’n a tlangzarh.
- Prime Minister Narendra Modia chuan vawiin khan Delhi-Dehradun economic corridor a hawng.
- Bihar Chief Minister Nitish Kumar chu vawiin khan Chief Minister anihna atangin a bang



#### HPC D

Mizoram sorkar leh Hmar People’s Convention - Democratic (Lalhmingthanga Sanate’s Faction) te chuan vawiin khan Sakawrdai Vengpui Community Hall-ah inremna thuthlung, Memorandum of Settlement an ziak a; inremna ziahna hun hmanpuitu Adviser to Chief Minister (Political) Pu Lalmuanpuia Punte, MLA chuan Mizoramah hnam bil hel an awm tawh loa a hriat thu a sawi.

Inremna thuthlungah hian Mizoram sorkar aiawhin Home secretary Pu David Lalthantluanga'n hming a ziak a, HPC-D (LF) aiawhin an president Pu Lalhmingthanga Sanate-in hming a ziak a ni.

Ruahman lâwk dan chuan HPC-D (LF) mi 43-te tan Mizoram sorkar chuan tun thla ni 30 khian CTI, Sesawngah silai tun inkhawm Laying of Arms Ceremony a buatsaih dawn a ni.

Pu Lalmuanpuia Punte chuan, hmasawanna hmuh tur anga ngaih hmuh a nih tâwk loh avangin helna a chhuak thin tih sawiin, vawiina inremna hian hmasawanna hnathawh a keng tel a ni, a ti a; hnam bil hel pawl Mizoramah an awm tawh lo nia an hriat avangin lawmawm a tih thu a sawi.

HPC-D (LF) president Pu Lalhmingthanga Sanate chuan inremna chu an duhthusam ang tak a ni lo chungin lungawi tawn theihna tur thil a ni chu lawmawm a tih thu a sawi a; hmar tlangdung hmasawanna tur Mizoram sorkarin a ngaihsak dawn a ni tih rinna nen nunphung pangngai zawm turin an rawn chhuak a, inremna thuthlung tihlawhtling turin theihtawp an chhuah dawn a ti a ni.

Mizoram chhunga ralthuam keng chi bil hel pawl la awm chhun nia hriat HPC-D (LF) te hi 2024 kum laihawl atangin a dawr tan a, September ni 20, 2024 khan Silchar Mizoram House ah inbiakna hmasa ber neih a ni a, boruak tha tak hnuaiah inthlahliam a ni. A kum leh October ni 10, 2025 ah Assembly Speaker Pu Lalbiakzama pisaah inbiak vawi 2-na neih a ni a, hetah hian an thil phut (charter of demand) an rawn pharh a, tha takin sawiho a ni. Hemi hnu hian Home Minister kaihhruai Committee lian din a ni a, October ni 28, 2025 khan thutkhawm a ni a, inbiakna neih tawh dan thlirho niin HPC-D (LF) te demand sawiho a nih bakah Mizoram sawrkar duhdan te sawifel a ni.

December ni 1, 2025 khan Aijal Club-ah inbiak vawi 3-na neih leh a ni a, Mizoram sorkar duhdan te hrilhhriat an ni a, December ni 2, 2025 ah HPC-D (LF) te hian Mizoram sorkar duhdan an pawm thu leh anmahni lam thil phut thenkhat ziakin Home Department ah an thlen a, official level ah indawr chhunzawm zel niin, kumin March ni 30, ah Adviser to CM (Political) Pu Lalmuanpuia Punte pisaah inbiakna hnuhnung ber neih a ni a, engkim a tul tur ang ang sawiho niin tun thla April ni 9 khan Home Minister hova official pawimawh kalkhawmten an thirho hnuah ruahmanna siam a ni a, vawiinah inremna ziahfel a ni thei ta a ni.

<><><>

## HOME VOTING

Aizawl Municipal Corporation-AMC inthlan atana kum upa te, damlo natna khirh bik nei polling station pan theilo te leh pianphung a rualbanlo polling station pan theilo te tana a vote thlak theihna tura ruahman, Home Voting ni 2 na chu vawiin khan kalpui chhunzawm a ni a hriat theih chinah vawiin hian mi 610 in vote an thlak a ni.

Nimin khan home voting atana inziaklut zingah zaa 36.72 vote a tla a ni.

Home Voting hi ningani thleng kalpui tura ruahman a ni a. Home Voting hi AMC Ward 19-ah kalpui vek tur a ni a, Ward tinah Home Voting Team pakhat theuh awm in, Home Voting ti tura dilna lut zat hi 2769 a ni a, ni 4 chhung a vote thlak hi zawh hman tura ruahman a ni, Municipal Ward – 2 ah dilna hi lut tamber in diltu mi 209 an awm a ni.

<><><>

## EX-CM AUTOBIOGRAPHY

MNF President leh Chief Minister hlui Pu Zoramthanga'n a chanchin a ziahna 'From Guerrilla Fighter to Chief Minister' chu vawiin khan Larsap General (Rtd) Vijay Kumar Singh a'n a tlangzarh.

Larsap General (Dr) Vijay Kumar Singh a chuan thusawiin "From Guerrilla Fighter to Chief Minister" tih lehkhabu chu mimal chanchin ziahna mai ni lo in Mizoram history leh politics hriat chian nana tangkai tak leh a ziaktu ngei tawnhriat atanga buatsaih, Mizoram hun tawn pawimawh tak chungchang tarlanna a ni a ti a . Lehkhabu chu rambuai lai atanga mipui sawrkar hnuai mawhphurhna leh hruaitu dinhmun pawimawh tak thlen dan chanchin tarlanna ani tih sawiin, he lehkhabu hian inbiakna, inhriatthiamna leh tumruhna hmanga harsatna tamtak chin fel theih a ni tih a lantir a ni, a ti.

Pu Zoramthanga lehkhabu ah hian Mizoram tana zalenna an sual dan chanchin leh Chief Minister a nih chhoh dan kimchang taka ziah a ni a, sapṭawnga ziaak niin a thinlung atanga a ziah a nih thu a sawi a, he chanchin ziaak tur hian lehkhabu dang rawn a ngai lo a, kum 51 chhung dairy a lo ziah tawh en chungina ziaak a ni, Mizo Nationalism Movement chanchin mi in chhui dawn se, a lehkhabu ziah aia chiang hi a awm a rin loh thu a sawi a, he lehkhabu hi mizo hnam movement history ah chuan a dictionary a tlin a rin thu a sawi bawk.

Pu Zoramthanga chuan rambuai hunlaia Indian Army lieutenant pakhat an mahni man tura rammu ve tho chanchin sawiin chu lieutenant chu tuna Governor nilai mek General (Retd) Vijay Kumar Singh a nih thu a sawi a, Pathianin thilmak tak ruahmanna a siam a, mi pahnih December ni 16, 1971 East Pakistan War laia lo inep

tawh leh indo thinte chu hetah hmun ralmuang bera chhal theihah intawn leh mai bakah a lehkhabu a tlangzarh sak leh thei a, thil thleng zen zen lo a ni a ti.

Pu Zoramthanga lehkhabu chhut saktu hi Penguin Random House of India an ni.

<><><>

## FIRE SERVICES WEEK

Fire Services Week chuan tukin khan Fire & Emergency Services Department Director Pu H.L. Thangzualan State puma hman turin a hawng a ni.

Kum tinin Fire Service Week hi ram pumah ni 14 leh 20 April chhungin hman thin a ni a, vawiin, April ni 14 bik hi Fire Service Day/Martyrs Day atan hman a ni thin bawk ni.

Pu H.L. Thangzuala chuan hawna thu sawiin a ram puma Fire Service Week hmanin a tum bulpui ber chu mipui vantlang leh mimal tin te, an nitin nun, khawsak leh chet velna tinrengah kangmei tichhuaklo tura invenna leh fimkhurna chang an hriat deuh deuhna tura inzirtir a nih thu a sawi a. Kumin Fire Service Week thupui sawizauvin Pu H.L. Thangzuala chuan, Kangmei lakah Sikul leh Damdawi inte a him zawk nan khawtlang mipuite kangmei tichhuak lo tura infuihna a nih thu a tarlang a. Fire Service Day 2026 pualin Department a thawk zawng zawngte chu mahni zawn theuhah inpekna thar nen, tha leh zual a hna thawk theuh tura sawmin, mipuite rawngbawltu an ni tih inhre thar theuh turin a chah nghal bawk a ni.

Mizoramah chuan kumin Fire Service Week pual hian damdawi in thlan bikahte Fire Safety Audit neih a ni dawn a. Hei bakah hian School hrang hrangah School naupangte Fire & Evacuation Drill leh Lecture & Demonstration neih pui an ni dawn bawk a ni.

Kumin Fire Service week pual hian Mizoram atangin F&ES a thawk mi 5 te chu Sorkar laipui Civil Defence & Home Guard Director General-Fire Service chuan an hnathawh that avangin Silver & Bronze Disc leh Commendation Certificate dawng turin a thlang a, chungte chu: Silver Disc dawngturin Pu Lalremmawia Divisional Fire Officer, Brone Disc dawng turin Firefighter R.Laltanliana Serchhip Fire Station, Firefighter H. Lalremruata Mamit Fire Station, Driver Grade – II Ramsangzela Mamit Fire Statio, Driver Grade – II FX Laltanpuia Serchhip Fire Station-te an ni.

<><><>

## MPCC PRESS CONF

MPCC thupuangtu leh general secretary Dr. Lallianchhunga chuan IAF-te tana Lengpui Airport bul ram lak a nih avanga ZPM sorkar thuneitu sang hriatpuina in cheng nuai 11,790 insemna awm anga lang chu Mizoram history-a mipui pawisa eirukna lian ber a ni a ti.

Vawiin khan Aizawl Press Club-ah thuthar thehdarhtute kawmin, Dr. Lallianchhunga chuan Indian Air Force te tana Lengpui Airport ram laknaah dan bawhchhiatna nasa tak a awm thu a sawi a; dan bawhchhe chungah Lengpui Airport bul ram IAF-te tana an lak theihna tura remtihna petute chu Chief Minister Pu Lalduhoma leh Revenue Minister Pu B. Lalchhanzova te an ni, a ti.

Dr Lallianchhunga chuan Val Upa Council (VUC) pawh ZPM sorkara hotu liante an inrawlh vang nge tun thlengin an la ngawi tih sawiin an benghriat ngeia cheng nuai tam tak eirukna thleng hi an ngawih bopui a nih chuan sorkar khalth ngil tura an awm ve reng hi a tul kher tawh lo, a ti a; IAF-te tana Lengpui Airport bul ram lak a nih avanga cheng nuai 11,790 insemna awm nia sawi hi Mizoram history-a mipui

pawisa eirukna lian ber a nih thu sawiin, cheng tam tak dik lo taka insemna a awm ngei nia lang hi chhui chhuah a nih theih nan leh a mawhphurtute dan anga hrem an nih ngei theih nan Congress party chuan theihtawp a chhuah zel dawn tih a sawi bawk.

<><><>

#### AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Chanchinthar hi naktuk zing dar 7 leh a chanve-ah puan leh a ni ang.

<><><>

#### PM

Prime Minister Narendra Modia chuan vawiin khan Delhi-Dehradun economic corridor a hawng. THusawiin Pu Modia chuan Uttarakhand-ah kumtluana khualzinte hipna tur ngaihpaawimawh anih thu a sawi a. Uttarakhand chu tunhnaiah thlasik laia khualzinte tlawh hlawh tak an ni chho tih sawiin thlasik infiamna lam leh inneihna hmun atan an hmang uar hle a ti a. Kumtluana khualzinte tlawh tam nih chu state sum leh pai dinhmun tan a tha hle a ti a. Vawiina hawn tak Delhi-Dehradun economic corridor chuan state tan hlawkna tam tak a thlen dawn a ni a ti bawk.

<><><>

#### BIHAR CM

Bihar BJP MLA Samrat Choudhary chu Bihar BJP Legislature Party leader atan thlan a ni. Heti hian Bihar Chief Minister thar ni mai turin hmabak a nei tha hle a. Vawiin khan Patnaah BJP legislature Party leader anih thu hi puan a ni a. Union Minister Shivraj Singh Chouhan chuan central observer niin leader thlanna hi a uap a. Pu Choudhary chu lungrual takin BJP Legislature Party leader atan thlan anih thu a puang a ni.

Pu Choudhary hian Lok Bhawan-ah Governor hmuin sawrkar thar a siam theih thu hi a thlen leh dawn a ni.

<><><>